

淳化秘閣法帖考正

淳化秘閣法帖考正

淳化秘閣法帖考正卷第六

琅邪王 謝虛舟詳定

天都秋水藕花居校刊

晉王羲之書一

王羲之字逸少司徒道從子尚書郎正之孫
淮南太守曠之子起家祕書郎征西將軍歷
右軍將軍會稽內史年五十九卒贈金紫光
祿大夫帖目當稱東晉右軍將軍會稽內史
王羲之書

適得書帖

此帖米老目爲僞作黃長睿亦云然姜白石言
自唐以前多是獨草不過兩字連屬若累數
十字而不斷號曰連綿遊絲此雖出於古人
不足爲奇反成大病古人作草如今人作真
其相連處特是引帶右軍書雖鳳翥龍翔實
則左規右矩未有連綿不斷者至顛素始專
用此法魏晉時未之有也此帖字相連屬如
筆不停綴者然既乏頓挫兼帶俗韻黃長睿
以爲筆無晉韻乃近世不工書者僞作不刊
之論也

中字草法作中帖作中多一折不合中乃顧釋
作中治按右軍帖有中冷無賴語則此正當
是中冷中冷甚悻悻猶言中冷無賴也悻悻
劉作怏怏顧作憤憤皆通都不知足下來一
言以中冷靜眠不知足下到門甚無意也顧
釋作來一非觀其筆勢亦是門不是一

此帖不論字非右軍即其詞句亦只是後來流
俗語長睿駁之良是

知欲東帖

知欲東帖與上適得書同是一手僞作後面差

涼奉對汝不等帖皆同雖筆較清拔要之皆
僞作也

謝之顧釋作謝欲按筆法下半多一折定非欲
字劉何釋作吳或近之之何當是云何或誤
作之何

差涼帖

與上二帖一手僞作

奉對帖

此帖九字中有兩以字劉顧釋上作比下作以
按兩以字筆法同皆當是比山谷鑒是

比草法當作以然右軍皆書作以與以字同故
劉顧遂分爲二

又以字篆作𠄎與已字同故右軍多用以爲已
蘭亭序以爲陳迹是也此等處右軍帖最多
本卷昏取以畢心以馳於彼皆用以爲已

汝不帖

此亦僞作米於前奉對下注已上四帖僞豈以
此一帖爲真耶粃糠眯目雖老米亦復不免
何也

前之當是前云舊釋皆作與

奄至帖

長睿云自適得書至馳悚耳中間諸帖除穆松
中秋二帖差似逸少書餘並近世不工書者
僞作按適得書等帖長睿以爲僞作信是此
奄至帖筆力清挺風神照映爲似右軍書但
比之右軍清駛有餘淳古不足耳長睿目爲
近世不工書僞作恐是過論

日月如馳帖

此與上奄至帖長睿以爲差似右軍是也米於
此帖下注以上三帖真則竟以汝不可言帖

亦目爲真過矣

穆松張彥遠二王帖錄作松當是王謝子弟小字右軍帖中往往有之省法酸感法顧釋作疏於文義安而書則是諸或由疾書筆誤

右軍草書鳳翥鸞翔實則左規右矩故爲古今絕品十七帖是其烜赫有名之書曾有一字怒張否以此稱量右軍凡筆勢怒張者皆非也王侍書模右軍帖乃以此等怒張之書爲右軍首選豈以此爲右軍絕奇書耶其無識一至於此

靈樞垂至帖

此帖筆頗清挺與上奄至日月兩帖略同然時見怒張態當是僞書中之清謹者面狀雖移神氣自一不可爲其瞞過也

考異云日月如馳靈樞垂至淳化帖張彥遠帖錄所載皆爲兩帖大觀合爲一帖竊謂更當合下慈顏幽翳垂三十年慈顏以母故越行耳與後伏想嫂安和正同

慈顏幽翳帖

此比上靈樞帖筆法正同首行猶謹嚴後則怒

張之至脚手盡露矣其僞不疑

自奄至此禍至此皆一手書非直一手并是一
時初猶專謹漸以怒張至慈顏幽翳則益縱
絕矣然自是當時好手所書故米老猶以奄
至日月二帖爲真與上適得書等帖佳惡故
不類吾向稱此四帖爲李北海所臨大是有
合

省別旦夕兩帖

此二帖在十七帖中右軍烜赫有名之書也長
睿皆列在僞中未曉米於旦夕帖下注以上

三帖真則并以慈顏幽翳爲真矣亦誤

省別帖以唐摹十七帖對校至字以字宜字担
字摹搨皆有失筆其餘字形雖同神觀迥絕
故知閣帖去真益遠

州將桓公桓宣武溫也穆帝時溫督荆梁四州
諸軍事安西將軍辟謝奕爲安西司馬故云
無奕外任也無奕謝奕字仁祖謝尚字桓溫
有事中原使尚率衆向壽春進號安西將軍
故云仁祖日往也

旦夕帖使言諸本皆全泉本少一折竟似欲字

合字誤也

嬾安和帖

此亦僞帖米老鑒是

此與前日月如馳帖同是一事此言嬾病前言
嬾背棄也此當在日月如馳前

松上下松即穆松古人于字或單稱或兩稱惟
意所適右軍於郗曇或稱重熙或稱熙正同
此於謝萬或稱萬或稱阿萬則更稱名且於
名上加一阿字尤見親厚無間之意自玉猶
小差玉施作慰按筆法當是至然文義當作

慰言嫫疾至篤得小差爲慰也蓋緣行筆太
速故有似至耳得涼漸和顧作利施作和當
以和爲正言得涼乃漸和耳蓋亦行筆速故
諸從帖

脩載王者之世將第三子歷荊州刺史帖云脩
載在達音問不數當是其在荊州時也司州
王胡之字脩齡朝廷欲綏緝河洛以胡之爲
西中郎將司州刺史假節以疾固辭未行而
卒故云司州疾篤不果西公私可恨也

此帖唐摹本失州疾篤一行十一字

此諸賢帖

達以異多小患以當是頃言達此刻與諸賢異
多小患也劉顧作須未是達人名右軍有得
達嘉興書等帖但未詳何人耳疾篤不得數
爲歎篤爲歎三字俱有失筆當由模搨有誤
爲一作可

米以此上兩帖爲真黃伯思俱目爲差近逸少
論太過

宰相安和帖

元章云僞

長睿云或云此帖乃郗愔書宰相者簡文帝作
相王時也殷生者殷浩也然此或是書愔語
耳而結字實近世人僞作愔書自與逸少早
年抗衡此帖了無晉韻其非審矣

噉豆鼠帖

此與上宰相安和同皆是僞作
豆或作宣非

旃罽胡桃帖

此載十七帖藥是二字原帖傍注故差小淳化
模入行中者失之

知足下以當是得言戎鹽爲服食要藥知足下
已得之也帖正作得泉本摹作謂誤也

方回郝愔字史稱其栖心絕穀與姐夫王羲之
高士許恂並有邁世之風帖云頃服食方回
近之吾此志知我者希是也

秋中帖

米以此上三帖爲真則亦以前噉豆鼠帖爲真
矣蓋誤

胛廣韻古狎切背上兩膊間也後漢張宗傳中
矛貫胛劉作脾風誤